

# San Nicolas

## Aruba Dushi Tera

Antes →



Na 1879, tempo cu Aruba Fosfaat Maatschappij a establecé na Aruba a nace un pueblo na e bahía na oost di e isla. A bin algun cas y tambe un faro (vuurtoren). Cos tabata bayendo bon te na 1914 tempo cu Aruba Fosfaat Maatschappij a sera porta. Esaki pa motibo di e competencia di paísnan mas grandi cu tambe a descubrí fosfaat y ademá e influencianan negativo di Prome Guerra Mundial.

For di e tempo ey San Nicolas a bira keto. Pero rond di 1924, tempo cu Lago Oil & Transport Company Ltd. tabata preparando pa cuminza funcioná, San Nicolas a bolbe haya bida. A lanta mas vivienda, cobamento di e haf pa preparé pa tanqueronan grandi, a bin un hospital cu equiponan moderno, y diferente barionan a bino, e.o.: Lago Heights, Essoville, Lagoville, Colony.

Durante e periodo 1924 - 1986 cu Lago tabata na Aruba, San Nicolas a conocé hopi progreso. E cantidad di habitantenan di nos isla a subi di 9.000 pa 54.000. Personanan di diferente nacionalidad a bin biba aki pa trabao. Di tur skina di e isla tabata core e busnan "di palo" pa hiba y trece trahandornan di Lago.

San Nicolas tabata e "Shopping Center" di Aruba. Cantidad di pacusnan a lanta den "Mainstreet" y for di tur districto e publico tabata bai San Nicolas pa haci compra, especialmente comestibles. Esaki pa motibo cu gran parti di e poblacion tabata empleá na Lago y tur empleado por haci uso di e prijsnan ventahoso di Lago Commisary. Henter famia tabata bai San Nicolas pa "shop".

Ban compará e portretnan: aunque e bista actual di caya grandi ta musta bunita cu matanan, e caya ta bashí cu excepcion di algun trahador stranhero riba descanso. Y antes riba e mesun skina nos ta mira cu e movecion di hende na pia y den auto ta mucho mas. Hasta a bira cu tiendanan y casnan ta tur será na trali di hero, en cambio antes e bida tabata sano. Tur esaki ta parti di progreso.

Despues di 1986 poco-poco San Nicolas a bolbe bai atras cu cierre di Lago. Apesar di hopi esfuerzo di gruponan y organisacionnan, kendenan a lanza varios campaña, e resultado no tabata cos di caba.



Te na 1990, ora cu Coastal a anunciá su jegada, e speranza a crece atrobe cerca e pueblo di San Nicolas.. Dia 29 di November 1990 pa 9.05 anochi e 'vlam' tan anhelá a sende atrobe.

Movecionan a cuminza atrobe y laga nos spera cu diferente generacionnan por goza pa hopi aña di e ambiente "gezellig" cu San Nicolas ta brinda.

← Awor

ICH





# CHABALITO

Number 2 - Año 2 - October, 1999 - Afl. 2,=

